

# PAULO LIWAKATETIGI FILIPEENSITEDI

Filipos nigotaga gonege anida aneetege romaanotedi. Iteloco nipodigi analee Grécia niginoa nokododi. Nigina oko ane lanikadi Filipos liciaceekawa romaanotedi. (Awinteloco Atos 16).

Paulo idei niwilogonagaxi naga didikotibige loiigi Cristo digoida Filipos. Paulo jigijaa odoejege me yadeegitiogi nibodicetedi anele aneetece Cristo. Paulo dipokoteloco Filipeensitedi nigina me yotaganenge Aneotedogoji codaa yalagata me yemaa me yaladi nigina iigo, odaa jigigo miniwataga Cristo me yewiga nigepaa ganigicatibige. Yalagata anodaagee Cristo me dinilionigatiditedibece negepaagicota moyeloadi, joanigidaa leegodi Aneotedogoji meote me yewigatace, codaa ideyate Lionigi nigica nimedi ane dagaxa me gonegegi. Yalagata me godiciagi lokokena digoina iigo. Nigidiaagidi ja yalagata Timóteo ijaa Epafrodito anoyaxawatece libakedi ane yajigote Goniotagodi. Idaagida me idei niwilogonagaxi, pida Paulo yalagata me ninitibigiwaji nigina ananakato Goniotagodi, codaa niginoa ane dakaketogodomi ayakadi me yaagadi nigida godinikegi. Paulo iige me dinoniciwagaditibigiwaji codaa me daga oigecagalege ane dakaketema leegodi Aneotedogoji yaxawatediogi. Codaa diniotagodetiogi leegodi nigicoa dinyeelo anoyajigota moyaxawa.

## Paulo yecoaditibige nigeladimigipitigi nigotaga Filipos

**1** <sup>1</sup>Ee Paulo, iniaa Timóteo, oko liotaka Jesus Cristo. Jiwakateenaga nagadi notaganagaxi makaamitagatiwaji, ane gadiomagatitedice Aneotedogoji makaami nepilidi, codaa midioka limedi me gadexocitege Jesus Cristo, anakaami nigeladimigipitigi nigotaga Filipos. Eledi jiwakateenagatibige nagadi notaganagaxi nigijoa lacilodi loiigi Cristo, codaa me nigijo eledi anoyaxawa nigidi noiigi. <sup>2</sup>Jemaanaga Aneotedogoji ane Godiodi iniaa Goniotagodi Jesus Cristo midioka limedi mowo aneletagadomitiwaji, codaa mowo gadaalegenali mele.

## Paulo idioka limedi me dipokoteloco nigidi oko nigina me yotaganenge Aneotedogoji

<sup>3</sup>Idokeji nigina me jowootibigajitiwaji, odaa iniotagodetalo Iniotagodi Aneotedogoji. <sup>4</sup>Nigina me jipokotalo Aneotedogoji me gadaxawanitetiwaji,

idioka limedi me idinitibeci nigina me jotaganege. <sup>5</sup>Iniotagodetalo Aneotedogoji leegodi meliodi madaxawani, codaa makaami yokaagetepi mida nigida ibakedi. Nigida ibakedi me jelogoditedibece nibodicetedi anele. Aidaagiditibige madaxawani nigijo odoejeji noko maleekoka iwagatiteda Goniotagodi codaa nigina natigide madaxawani. <sup>6</sup>Aneotedogoji jiginiaa yojogotedini meote nigica anele catiwedi gadaalegenali. Odaa ajawienataka meote nigepaa igodi nigida libakedi. Igodi nigida libakedi nigica noko Jesus Cristo nige dopitedijo.

<sup>7</sup>Gademaanitiwaji. Codaa ewi me gademaani akaamitawecetiwaji, leegodi madaxawanitece nigida nibakedi anele ane najigotediwa Aneotedogoji. Natigide akaamitiwaji jagaga awiite nigida nibakedi, maleeginaagejo niwilogonagaxi, jigijo me jakadi me jigidi nigijoa ane beyagi modotagatibige gobodicetedi anele, codaa me jikee niginoa gobodicetedi anele, mewi. <sup>8</sup>Aneotedogoji yowoogodi mewi me jotaga meji me gademaani akaamitawecetiwaji, liciagi Jesus Cristo me gademaani.

<sup>9</sup>Nigina me jipokotibigalo Aneotedogoji, jipokotalo meote menegegi emaani iniaaginiwa Aneotedogoji, codaa me ganioxadipi. Joanigidaa nige enegegitace ewi mowoogoti Aneotedogoji, odaa dagaxa mele mowoogoti mawini ane igenaga. <sup>10</sup>Amaleegaga akatitiwaji maniwinita inokina ane dagaxa mele. Joanigidaa nigicota noko nige dopitedijo Cristo, akamagakaamitiwaji agaleegica ane beyagi catiwedi gadaalegenali. Eleditace agaleegica ane yakadi makaami laagetepi mawii ane beyagi. <sup>11</sup>Igaataga jigidaa ane leeditibige me eni me gadewikitiwaji, mawiite inoatawece ane igenaga leegodi me gadexocitege Jesus Cristo. Codaa joanigidaa leegodi nigina oko moiwenigide, codaa modogetetibigimece Aneotedogoji.

### **Paulo ninitibece leegodi nigidi oko magaga oyelogoditedibece nibodicetedi anele**

<sup>12</sup>Inioxadipi, jema mowoogoti yawikodico jiginaa owo eliodi oko nogowajipatalo nibodicetedi anele, anoditece Cristo. <sup>13</sup>Leegodi niginoa ininyaco, eliodi oko oyowoogodi me idejotice niwilogonagaxi leegodi me ee liotagi Cristo. Idiwatawece iodagawadi anoyowie ligeladi-nelegi ninionigi romaanotedi oyowoogodi, codaa iditawece nigidi eledi oko digoina meetaga oyowoogodi. <sup>14</sup>Eleditace leegodi minaagejo niwilogonagaxi, eliodi gonioxadipi ja dagaxa monakato Goniotagodi, codaa mabo laalegena moyelogoditedibece nibodicetedi anele, adoitibigiwaji.

<sup>15</sup>Ewi midi onatecegidi oko anoyelogoditece Cristo, pida oyelogodi leegodi monocetomi, codaa me lemaanigi me napetaga. Pida ina eledi oko oditece Cristo leegodi oyemaa mowo anele. <sup>16-17</sup>Odaa jogoditece Cristo leegodi etidema. Eleditace oyowoogodi me Aneotedogoji najigotediwa ibakedi me jikee nibodicetedi anele anoditece Cristo, mewi. Pida nigijo eledi oko agowote nibakedi mele laalegenali, oditece Cristo, pida owote igaataga odoletibige me yelogotibigiwaji. Adiitigilo niginoa lowooko nigina modiletibige dogowote me dagaxa me jawikode minaagejo niwilogonagaxi.

<sup>18</sup>Nigida baadigica jaoga. Pida anida jaoga, minatawece oko oditece Cristo, ina nigina anoditece Cristo, pida laalegenali ailagaticoace, idiaageledi begewi moditece Cristo, manitawece laalegena. Joanigidaa leegodi me idinitibeci. Idokee me idinitibeci, agica liniogo. <sup>19</sup>Igaataga jowoogodi Aneotedogoji micota me idatamagateetetema niginoa yawikodico leegodi me ipokitibigalotiwaji me idaxawa, codaa Liwigo Jesus Cristo me idoniciwagadi. <sup>20</sup>Eliodi me jemaa, codaa me inibeotege me daga jinetetema ane yoenataka oditaga ja idiboliga, pida inibeotege midokee mabo yaalegena me jiwenigide Cristo minitawece yoniciwaga, codaa aneji me idewiga. Jigidaa ane jemaa me jao, aibeyacagadi me idewiga, ogoa, domige ideleo. <sup>21</sup>Igaataga digo aneji malee idewiga, idewigatema iniokiniwateda Cristo, pida nige ideleo, odaa ja jibatege ica inagajegi ane yotetetedomi. <sup>22</sup>Pida nigalee inaagejo me idewiga digoina iigo, odaa ejakadita me jao nibakedi ane yaxawa oko. Odaa joanigidaa leegodi ajowoogodi nigica бага jemaa, domige me idewiga, ogoa, domige me ideleo. <sup>23</sup>Igaataga eliodi me jemaa nigidoa itoa. Jegeliodi me domaga jemaa me ideleo, oditaga ja jika mejigoteloco nigina iigo, oditaga jejegoticogi miniwataga Cristo, ane dagaxa meletomi. <sup>24</sup>Pida akaami leegoditiwaji, dagaxa mele minaagejo me idewiga digoina, odaa gadaxawanitiwaji. <sup>25</sup>Jowoogodi nigida yowoogo me ilagatice. Odaa jowoogodi minaagejo makaamitagatiwaji, amaleegaga gadaxawanitiwaji mepaanaga anakatoni Goniotagodi. Odaa joanigidaa leegodi icota me dagaxatace maniniitibecitiwaji. <sup>26</sup>Joanigidaa nige ejotacagawatiwaji, icota mogetetalo Jesus Cristo, leegodi mejotagawatiwaji.

<sup>27</sup>Joanigidaagida nigica anida jaoga, aneni me gadewiki leeditibige me itege gobodicetedi anele aneetece Cristo me nikeetogowa nigica anejinaga me godewiga. Joanigidaa nigica me jakadi mejigo gadiwinitiwaji, ogoa, migetaga jajipatibece anodaagenititiwaji, odaa ja jowoogodi makaamitawecetiwaji idokida gadowoogo, codaa me jowoogodi midioka limedi matitetitiwaji me iwagatakani, codaa adinoniciwagatiwaji moteteni liigaxinaganegeco gatiwagatakanegegi ane icogotigi minoataga gobodicetedi anele, aneetece Cristo. <sup>28</sup>Icota me jowoogoditiwaji me dagadoiita okanicodaagicata anowotagadomi gadaxakawepodi, pida idokee mabo gadaalegenalitiwaji. Nigina mabo gadaalegenalitiwaji me aatege gadaxakawepodi jigikeenitiogi Aneotedogoji micota me yaagadi, pida akamagakaami jagagekenitibigiwaji, leegodi Aneotedogoji eote manigaanyetiwaji. <sup>29</sup>Igaataga Aneotedogoji akaa gadiwenigidenititiwaji. Leegodi aneote Cristo, Aneotedogoji ja yajigotedagawatiwaji manakatoni iniaaginiwa Cristo, codaa mawikodeetema. <sup>30</sup>Odaa nigida makaamitiwaji idokee madinoniciwagati madaxawani me jiigatege godaxakawepodi. Jaganatitiwaji anodaageeta me idinoniciwagadi me jiitege codaa jaganibodicetiwa anodaageji me idinoniciwagadi codaa nigina noko.

**Cristo diniwikodetedibece, odaa ele me jaoga liciagi**

**2** <sup>1</sup> Nigida moko godoniciwadi leegodi me godexogotege Cristo, codaa godocaganeege leegodi me godemaa, codaa Liwigo Aneotedogoji ini mokotaga digeladetiogoji codaa me yotaganeege godaalegena, eo godowoogo, codaa Aneotedogoji dagaxa me godiwikode. <sup>2</sup> Joanigidaa leegodi me jipokotagawatiwaji midokida gadowoogo, codaa madinemaanitiwaji oleetibige midokida aneni, codaa jipokotagawatiwaji matecigiteloco nigica ane gadowoogo codaa nigica anemaanitiwaji. Joanigidaagee nigawii nigida anejitagawa, odaa eliodi me idinitibeci. <sup>3</sup> Jinaga domaga ica anawii daga leegodi memaanitiwaji akamokakaami manigaanye, ogoa, migetaga idoka leegodi moleetibige me gadelokitiwaji. Pida adiniwikodenitibece lodoe nigina eledi oko, ademiita nigina eledi oko micataga daga dagaxa me gonegegi caticedi akaamitiwaji. <sup>4</sup> Jinogoleetibige nigina anakamokakaamitatiwaji mida anawiite, pida oleetibige nigina anagagida anowo eledi oko.

<sup>5</sup> Ele midokee moleetibige gadowooko me liciaco Jesus Cristo lowooko.

<sup>6</sup> Anidioka limedi me liciagi Aneotedogoji,  
pida ayecewe me liciagi Aneotedogoji.

<sup>7</sup> Idapaga yemaa me ika idiwatawece nigicoa ane nepilidi digoida  
ditibigimedi.

Odaa ja diniwikodetedibece micataga nigina niotagi,  
codaa nigijo menagi liciagi okanicodaagica oko.

<sup>8</sup> Nigijo malee liciagi okanicodaagica goneleegiwa,  
eliiodi me diniwikodetedibece,  
codaa idapaga noleteta me yeleo,  
joanigidaagee eyiwagadi Aneotedogoji  
negepaa yeleo madataga nicanaganagate.

<sup>9</sup> Joanigidaa leegodi Aneotedogoji meote Cristo me dagaxa me  
gonegegi nagaxatedeloco inoatawece,  
eledi yajigote Liboonagadi ane dagaxa me gonegegi caticedi  
okanicodaagica eledi boonagadi.

<sup>10</sup> Eotedibige micota minatawece oyamagatedini lokotidi lodoe Jesus,  
odaa joanigidaagee odogetetibigimece nigowajipata Liboonagadi,  
iditawece aniditigi ditibigimedi,  
codaa aninatigi digoina iigo,  
codaa minoatawece émagaga catinedi iigo.

<sup>11</sup> Icota miditawece modi lodoe eledi oko codaa me niwicidi,  
Jesus Cristo me Goniotagodi,  
Niotagodi inoatawece,  
joanigidaagee nige oiwenigide Aneotedogoji ane Godiodi.

### Leeditibige me godiciagi lokokena digoina iigo

<sup>12</sup>Enice yokaagetedipi yemaanigipi, digo mijoataga Cristo meyiwaagadi Eliodi, codaa akaamitiwaji midokee me iwagatitetiwaji nigijoa iigaxinaganegeco nigijo maleegidiaagejo makaamitagatiwaji, pida dagaxa mida jaoga me iwagatitetiwaji iigaxinaganegeco nigina me leegitagawatiwaji me gadotoniticoace. Ele midokee madinoniciwagatitiwaji mawii nigica aneni me gadewiki me digicata gabatiigi, madoitalo, codaa me eemiteetigilo Aneotedogoji. <sup>13</sup>Leegodi Aneotedogoji Nigijoa anidokee me diba gadiwigotigitiwaji, eotedibige moleetibige, codaa makati mawii nigica ane yemaa, aneletagadomitiwaji.

<sup>14</sup>Nigina nige awiitiwaji okanicodaagica, jinogotaganitibece leegodi ane gabakedi, otegexaagaga apetiitiwaji. <sup>15-16</sup>Awii nigida anejitagawatiwaji amanagawini agica ane yakadi mee mawii ane beyagi, odaa agica gabatiigitiwaji. Odaa nigidaageni jagakaami Aneotedogoji lionigipi, agica gaantokaagini gabeyacegegi, mawaanitege nigina oko ane dogoyowoogodi mowote ane igenaga, codaa nigidi oko beyagi. Nigida makaamitiwaji ane ideoni liwigotigi nigidi oko gadiciagi niginoa yotetitedi ane datale digoida ditibigimedi ane nexocaga, nigina nige daga ikani me iwagatakanitiwaji, codaa nige elogotitedibece nibodicetedi ane ane icogotedigi miniwataga Aneotedogoji, aneo godewiga. Nigina nige dogotaganitibecetiwaji codaa nige dagadinotigimadenititiwaji, awii me idinitibeci nigica noko nige dopitedijo Cristo, leegodi agica daga atooa me idinoniciwagadi, aiciagi nigina nalokodegecajo ane dinenyagadi, codaa me diniciticobeece me walokodi, pida nigidiaagidi aniadi, eledi aiciagi nigina aneliodi me diba, pida agica nigaanye.

<sup>17</sup>Nigijo oko ane yediatece Aneotedogoji okanicodaagica liboonigi me docagatalo, odaa leeditibige me nadoogoditeloco lawodi eijeegagi ditibigimedi nigidi liboonigitalo Aneotedogoji. Natigide jaganakatonitetiwaji Goniotagodi, odaa gatiwagakanegegi liciagi nigijo niboongi anoyajigotalo Aneotedogoji. Ee degetideloadi, odaa yawodi taganado. Codaa yawodi taga liciagi nigijoa lawodi ejedi ananadoogoditeloco ditibigimedi nigina nogeedi anoibotalo Aneotedogoji. Degenotiwa nigida niciagi, dagaxa me idinitibeci, codaa makaami inikaawepodi. <sup>18</sup>Odaa akaami eleditiwaji aniniitibeci, codaa makaami inikaawepodi.

### Timóteo iniaa Epafrodito

<sup>19</sup>Nigina nige yemaa Goniotagodi Jesus, jalitege me age me jakadi me jiigeticogi Timóteo makaamitagatiwaji, amaleegaga jowoogodi anodaagenititiwaji, codaa amaleegaga idioka limedi me jilidagaditace me jiba. <sup>20</sup>Igaataga iniokini mini meetaga codaa ane lowooko liciaco yowooko, codaa begewi me doweditagalocotiawaji. <sup>21</sup>Igaataga digoina meetaga inatawece eledi oko odoletibige nigica anidiokidi meletema, idigida agodoletibige

Jesus Cristo ane yemaa. <sup>22</sup>Pida akamagakaamitiwaji owoogoti Timóteo me ikee me yakadi manakatonitiwaji. Timóteo idejigota micataga daga ionigi, emege micataga degee eliodi. Eliodi me jibaaga micataga dogoko niotagipi me jelogotagatedibece nibodicetedi anele ane icogotedigi miniwataga Aneotedogoji. <sup>23</sup>Joanigidaa leegodi me niginiaagini ane inibeotege me jiigeticogi makaamitagatiwaji, nigina nige jowoogodi aneji. <sup>24</sup>Pida jinakato Goniotagodi me daga leegi, odaa emegeeta jakadi mejigo makaamitagatiwaji.

<sup>25</sup>Pida jakadi ina me leeditibige me jiiige mopiticogi makaamitagatiwaji gonioxoa Epafrodito. Ibakawa, codaa meliodi me idinoniciwagataga me jelogotaga nibodicetedi anele, micoataga niginoa iodagawadi ane dinoniciwagaditibigiwaji. Codaa akamagakaamitiwaji aniwakateeni me idaxawa, nigijo naga inoa ane aniaditibige meetaga. <sup>26</sup>Jimonya mopi igaataga eliodi me gadiatitiwaji, codaa eliodi me iwikodetibigagajitiwaji leegodi mabodicetibige me deelotika. <sup>27</sup>Ewi mijo me deelotika, codaa ja domaga yeleo. Pida Aneotedogoji iwikode, codaa agijokijo Epafrodito, pida ee eledi idiwikode Aneotedogoji, aidika me ee agecagalo. <sup>28</sup>Joanigidaa me enegegi jemaa me jiigeticogi makaamitagatiwaji, amaleegaga anatitace, odaa jaganiniitacibecitiwaji, codaa eemoda agaleege agecagalo. <sup>29</sup>Odaa jemaa mele mabaatege Epafrodito, igaataga eledi nebi Goniotagodi, codaa jemaa maniniitibecitiwaji. Codaa eemiteetibige inatawece oko ane liciagi Epafrodito. <sup>30</sup>Pida leegodi adinowedi, odaa ja domaga yeleo leegodi libakeditema Cristo. Eo nigida libakedi me idaxawatece nigijo ane dagakati madaxawanitecetiwaji.

### Anodaagee Aneotedogoji meote me godegenaga

**3** <sup>1</sup>Inioxoadipi, digawini owidijedi yotaga. Aniniitibeci leegoditiwaji mida anenitege Goniotagodi. Daga jiditace nigijoa baanaga jidi, aidigecagalege, pida gadaxawanitiwaji matiteteloco gatiwagatakanegegi.

<sup>2</sup>Anidakitiogi nigijo ane niigaxinaganagatece ane beyagi, nigidi oko liciagi necexodi (ane digica jaoga), idioka limedi moditibece me leeditibige me idinakagitaga ane lakatigi judeutedi moikee me loiigi Aneotedogoji. <sup>3</sup>Igaataga nigida moko begewi moko Aneotedogoji loiigi. Igaataga Aneotedogoji Liwigo godaxawa me jogeegatibigimece Aneotedogoji, godinitibece leegodi mida anejinagatege Cristo. Nigida moko ajinakatonaga ane lakatigi daga idinakagitaga.

<sup>4</sup>Codaa emege jakadi daga jinakato lakataga yoiigi me jocagatalo Aneotedogoji. Digica ane diletibige daga yakadi me nakato niginoa lakataga, ee dagaxatace me domigida ane leegodi me jinakato niginoa lakataga yoiigi. <sup>5</sup>Igaataga nigijo negeote oito nokododi me janitini, odaa jegetidakagi ane lakatigi yoiigi, leegodi mida anejitege loiigi Israel. Ee litaagi ane licogegi Benjamim. Iditawece eiododipi hebreu (ane loiigi Israel). Jigijo me jotete lajoinaganegeco yoiigi leegodi jigijo me ee fariseu. <sup>6</sup>Nigijo jotigide idioka limedi me joletibige nigica ane domaga yemaa Aneotedogoji, odaa ja jiatetibece Cristo loiigi (jiletibige daantigidaagida ica ane

yemaa Aneotedogoji). Jigijo me jotete lajoinaganegeco Moisés. Odaa joanigidaa nigina ane yoiigi modiletibige daga idegenaga nigijo aneji.

<sup>7</sup>Pida leegodi nigijo Cristo ane igotediwa, ijoatawece nigijoa ane jao niwaló nigijo jotigide, nigina natigide idejigotalo micataga nigina ane digica niwaló.

<sup>8</sup>Pida anewi, ijotawece nigijo ane inepilidi codaa me nigijo aneji jotigide idejigotalo micataga nigina ane digicata niwaló. Pida ane diniwaloetomi catedi nigijo aneji, me jowoogodi Jesus Cristo me Iniotagodi. Jigijaa leegodi Cristo me jika ijoatawece nigijoa ane jinakato nigijo jotigide, nigina natigide idejigotalo ijoatawece nigijoa ane inepilidi codaa aneji micataga nigina naagogo, jaotibige me jakadi mida anejitege Cristo, <sup>9</sup>codaa jaotibige me jakadi me idexogotege. Nigina natigide agalee joletibige daga idegenaga leegodi me jotete lajoinaganegeco Moisés. Pida ja idegenaga leegodi me jagatalo Cristo. Aneotedogoji jegeote me idegenaga, leegodi mejiwagadi Cristo.

<sup>10</sup>Nigina natigide jemaa miniokiniwateda me jowoogodi Cristo, codaa jemaa me najigotediwa nigijo nimawenegegi aneo me yewigatace, amaleegaga jakadi me jibotege yawikodico digo anee me abotetege lawikodico. Niginoa yawikodico inoa leegodi mida anejitege Cristo. Eledi jemaa me najigotediwa nimawenegegi amaleegaga jakadi me daga idoitege némaga nige limedi me ideleo, digo mijoataga me daga doitege lemegegi.

<sup>11</sup>Odaa joanigidaagee jakadi me inibeotege me idewigatace midiaagejo miniwataga, nigicota Aneotedogoji me yewikatiditace émagaga.

### **Idinoniciwagadi me idewigatema Cristo micataga nalokodegecajo laweegenigi**

<sup>12</sup>Agejitagawatiwaji daantaga jakadi inoatawece, codaa daaditagadiaagica ibatiigi. Pida idinoniciwagadi me ingaanyetece nigica Cristo aneetediwa me najigotediwa leegodi me dinigaanyetedici mida anejitege. (Idinoniciwagadi micataga nalokodegecajo me dinoniciwagadi me dinigaanyetece nogeedi.)

<sup>13</sup>Inioxadipi, ageji daantaga ingaanyetece nigijo Cristo aneetediwa. Pida onidateci ane jao, jemaa me idaagiditibige nigijoa baanaga jixomagateetedi, codaa jiwiticogi idokida odoo. (Micataga nigina nalokodegecajo.) <sup>14</sup>Aneotedogoji jegeniditediwa digoida ditibigimedi me idewigatema Jesus Cristo, odaa idinoniciwagadi (micataga nigina nalokodegecajo) me joletibige me ingaanyetece nigica inogeedi, aneetediwa Cristo me najigotediwa leegodi me idewigatema.

<sup>15</sup>Okotawece baanaga godilitema gotiwagakanenegegi, baanaga godiciagi nigina nigaanigawaanigi me ili nigepaa icota me goneleegiwa, idatawece leeditibige me jowooga nigida yowoogo. Digica ina akaamitelocotiwaji aneeledi anee me dowooko, Aneotedogoji ikeetedagawatiwaji ane igenaga. <sup>16</sup>Pida ele me idapaga jiiigaticogi mejiwagatece niigenatakanenegeco, anejiwagatece codaa nigina natigide, idokidata mele me godigecagalege.

<sup>17</sup>Inioxadipi, anowiikiitiwa aneji me idewiga akaamitawecetiwaji, codaa ina бага awini nigijo ane newiga digo meetaga aneji me idewiga.



<sup>18</sup>Jegejitagawatiwaji, odaa nigina natigide jinoe nigina mejitacagawatiwaji meliodi oko lakapetedipi Cristo, leegodi agoyiwagadi me yeletetema niginoa loenataka ane beyagi digoida mada nicenaganagate.

<sup>19</sup>Aneotedogoji iigetedicogi minitaga noledi ane daga ipe. Nigidi oko inoka oyiwigadi nigicoa anepaa lemaanaga lolaadi. Odinagaxaketece nigicoa loenataka ane beyagi ane domaga leeditibige moniboligatece. Inoka oyowo niginoa anida aneetege nigina iigo. <sup>20</sup>Pida okomogoko gonipodigi anejonaga бага digoida ditibigimedi. Idioka limedi me inibeonagatege lanokegi me icogotedibigimece digoida ditibigimedi, Goniotagodi Jesus Cristo anicota meote me godewigatace. <sup>21</sup>Icota me iigi nigina godolaadi ane digica loniciwaga, ane yeleo, odaa najigotedogowa godolaadi gela ane daga yeleo, liciagi epaa lolaadi loniciwengenigi. Yatite nigijo nimawenegegi nelegi meote godolaadi gela. Nigida nimawenegegi eote inoatawece niginoa aninoa micota moyiwagadi.

**Paulo yajacagaditibigiwaji filipeensitedi codaa diigaxinagatece  
anodaagee me jotaganegenaga Aneotedogoji**

**4** <sup>1</sup>Inioxoadipi, eliodi me gademaanitiwaji, codaa me gadiatitiwaji. Idinitibeci leegodi akaamitiwaji, codaa leegodi nagakamagakaamitiwaji nigica inogeedi me jiba, iciagi nigina ane dinigaanyetece lale me walokodi. Inioxoadipi yemaanigipi ina bagatiteti manakatoni Goniotagodi.

<sup>2</sup>Jipokotagawa Evódia aniaa Síntique me dagadiaa adinapetegenitacetiwaji, pida okanicodaagadinadeegi makaami dinioxomigi leegodi mida anenitege Goniotagodi. <sup>3</sup>Yokaagedi, anidokee madaxawani, jipokotagawa maxawani nigidi itoataale iwaalepodi. Igaataga nigidi itoa iwaalepodi, ijaa Clemente, codaa me iditawece nigijo eletidi yokaagetepidi, eliodi me yaxawepodi me jibaaga, me jelogotagatedibece gobodicetedi anele ane icogotedicogi miniwataga Aneotedogoji. Aneotedogoji ja iditedini liboonagatedi nigidi oko maditaga nagajo notaganagaxi anidiwa liboonagatedi oko anicota me yewikatiditace odaa jigidiaagi miniwataga.

<sup>4</sup>Ele midokee maniniitibecitiwaji leegodi mida anenitege Goniotagodi. Ejitacagawatiwaji, aniniitibeci!

<sup>5</sup>Oleetibige makaami nigina ane nigiwatece okanicodaagica oko. Igaataga Goniotagodi ayajebi, dopitacedijo. <sup>6</sup>Jinigica gaantokaagini ane gadigecagalegeni! Pida nigina motaganegenitedibece Aneotedogoji, ipokitalo nigica anopootibige. Idioka limedi maniotagodeetalo catiwedi gadaalegena, nigina mipokitalo. <sup>7</sup>Odaa amanagawini, Aneotedogoji eote gadaalegenali mele, codaa yotete gadowooko leegodi me gadexocitege Jesus Cristo. Ajakataga me jowoogotaga nigica anodaagee me yotete gadaalegena, codaa me godowooko.

<sup>8</sup>Digawini owidijegi anejitagawa inioxoadipi. Ele midokee mowoo inoatawece anenegegi ele, codaa ane leeditibige me jiwenigidenaga, nigina



anewi, nigina ane leeditibige me jeemiteegatibige, ina ane igenaga, ina ane digica lapioyagajegi, nigina ane libinienigi, codaa nigina aninatawece oko oyakadi mele. <sup>9</sup>Awii nigijo ane jajigotagawa me oenitiwaji, baanaga jiigaxitagadicitiwaji. Awii nigijo anejitagawa, codaa iwitece anodaageji. Odaa Aneotedogoji eote gadaalegena mele, codaa ideite makaamitagatiwaji.

**Paulo diniotagodetiogi leegodi nogeedi anoiwakateetibige**

<sup>10</sup>Leegodi me idewiga me idexogotege Goniotagodi, odaa jigidaa leegodi meliodi me idinitibeci, ja domaga leegi, nagakatitacetiwaji me ikeeni moleetibige madaxawani. Jowoogodi nigida makaamitiwaji midokee me domegemaani madaxawani, pida agepecica ganimawenegegi maniwakateenitiwa ane gadaxawanatakanegegi. <sup>11</sup>Agica daga jotagatibece leegodi minoa igalanaga. Igaataga ja jowoogodi me idinitibeci leegodi nigina anigidida anidi meetaga. <sup>12</sup>Idatecibece minoa ane jopotibige, codaa midatibece me iigotice ane jakadi. Codaa ja jowoogodi me idinitibeci okanicodaagica anejotice, ina mowidi iweenaga, ogoa, domige ina me idigicile; ina me inoa ane jopotibige, ogoa, domige ina me digica ane jopotibige. <sup>13</sup>Jakadi me idinatitalo inoatawece niginoan ganicinoa, leegodi Cristo najigotediwa yoniciwaga me jakadi me idinatitalo.

<sup>14</sup>Pida nigida makaamitiwaji eliodi mawii anele nigijo madaxawani minoa ane jopotibige. <sup>15</sup>Akamagakaamitiwaji, filipeensitedi, eliodi mowoogoti nigijo naga idoditicogi nipodigi Macedônia, me gela me idinojogotini me jelogoditedibece nibodicetedi anele makaamitagatiwaji, akamokakaamitatiwaji madaxawanitece nigijoa ane jopotibige. Agicaeledi lapo loiigi Cristo ane idaxawa. Akamokakaamitatiwaji madediani, pida jagagica anabaatege nigijo naganiboloiteeni ibakedi me gadiigaxini.



(Filipenses 4.16)

<sup>16</sup>Nigijjo me idiaagejo mani nigotaga Tessalônica, eliodi me jawikode leegodi minoa ane jopotibige. Pida idatibece maniwakateenitibigiji dinyeelo madaxawanitiwaji. <sup>17</sup>Pida agidigida daga joletibige midokee maniwakateenitibigiji niginoa gaboonaagatiwaji. Odaa jemaa Aneotedogoji me yajigotedagawa ane nagaxatelo loco caticedi nigijjoa ananiwakateenitibigiji.

<sup>18</sup>Ja jibatege nigijjoa gadiwakatedi idiwatawece anakaa jopotibige, codaa iigotedice. Odaa agaleegica ane jopotibige, leegodi Epafrodito jegenoodi ane aniwakateenitibigijitiwaji. Nigijjoa ane aniwakateenitibigijitiwaji liciagi nigina aneletege lanigi anoibootalo Aneotedogoji, odaa dibatetege leegodi yemaa. <sup>19</sup>Aneotedogoji Inoenogodi yajigotedagawa inoatawece anopootibige leegoditiwaji mida anenitege Jesus Cristo. Odaa yakadi me yajigotedagawa inoatawece, leegodi jegepaa iige inoatawece liicagajetecidi anele. <sup>20</sup>Jemaanaga me inatawece oko odogetetibigimece Aneotedogoji Godiodi nigepaa ganigaticibige. Odaa jigidaagee. (Amém.)

#### **Owidijedi lotaga Paulo me yecoaditibige filipeensitedi**

<sup>21</sup>Idecoaditece ijotawece nigijjo Aneotedogoji ane iomagaditedice mepoka nepiliditeda, nigidi anida aneetege Jesus Cristo. Codaa gonioxoadipi aninaa digoina meetaga eledi oyecoaditibigagajitiwaji. <sup>22</sup>Inatawece nigina Aneotedogoji ane iomagaditedice, aninaa digoina, joaniginaa oyecoaditibigagajitiwaji, codaa nigina anoyiwagadi Goniotagodi ane nibaagatigi ligeladi César, ninionigi-eliodi romaanotedi, iditawece eliodi moyemaa moyecoaditibigagajitiwaji.

<sup>23</sup>Natigide jemaa Goniotagodi Jesus Cristo midioka limedi meliodi meletedagadomitiwaji. Odaa jigidaagee. (Amém.)